



Tuáivu čuovâ sevŋâdâsâst

Taat kiđđâ lii lamaš historjâlii hirmástuttem äigi. Ruošâ algâtem vijdes suáti Ukrainast 24. kuovâmáánu lii čuuvtij muivim mii uápis maailmoornig. Majemui aavigij tábáhtusah láá finnim syemmiliid já oles Euroop koiđâdid koččâmušâid torvoost.

Suátitooimah Euroopast tovâtteh kelduu taan iveááigán. Luánu uđđâ moránem já šoddâm ääigi mij keččâp uđâskuuvijđ hiávu vuoimijn: kuávdásmittum tykkipääččim hiävuh kaavpugijn já panssarváávuin mottáás viljâpiälđuin. Liijká kiđđuv piäiváásuonjâreh čuovâneh jo tain-uv kuuvijn.

Taat kyevtlágánvuotâ lii orostittee já siämmást tast lii miinii uáppásijđ ristâlâš ulmuid. Mij eellip Immeel maailmist, mii muštoot mii Immeel pyerivuodâst já orroom immâšist. Siämmást mij tubdâp maailm já mii jieččân ruávis epitievâslâšvuodâ. Mij lep taan maailmist luhottesvuodâi viästust, já ohtâ stuárráamus luhottesvuotâ lii ulmuu vyehti jieččiivuotân, viärráamu tááhust čuávumušâin peerusthánnáá. Suáđih láá máttáattâm mijjân meid ulmuu hirmos julmevuodâst nuubij kuáttá. Nube tááhust mist lii historjâlâš tuodâštus maangâi ulmui spiekâstâhlii epijieččiivuodâst julmevuodâi kooskâst.

Taan ive pessijâševangelium lii Luukas evangeliumist. Jeesus čuávum nisoneh láá monâmin tooláá idedist Jeesus häävdi luus, ko sij hoksáji, ete häävdi keđgi lâi sirdum meddâl. Sij kavni kuárus häävdi. Sij hiämáskii. Kivkked sii oovdâst čuázžuv kyehti almaa, Immeel engâleh. Sunni saahâ lii: "Mondiet tij usâvetted ellee jâmmei juávhust? Ij sun lah tääbbin, sun lii pajanâm jámmist." (Luuk. 24: 5-6) Nisonij piedgejum maailmân šadda kivkked tuáivu.

Ohtâ vaiguttejee, taaidâlâš valdâlem tai nisonij lohđuttem tubdâmušâin ovdil pessijâšiideed lii Jaakko Löytty laavlâ Toisen päivän iltana (Nube peeivi ehidist).

Sevŋis pálgái mielđ mun uázžum jotteed, / jiemge tieđe määđhi meereest. / Suoivuuh keččâleh munjin olleed / toh halijdeh et čuávum maaneest.

Liijká laavlâ muštoot muččâdávť sooroost já sevŋâdâsâst elleid pajaspajanem tuodâlâšvuodâst:

Kii murâšlii mielâ lohđut? / Lohđut savváin: / Mondiet tobbeen keččâlah eellim kavniđ, / juávhust jáámmám ulmuin.

Hävdi ij lah eellim lopâlâš meeri. Jáámmim ij celkkii lopâlii sääni. Pajaspajanâm Kristus servikodde lii puávdajum eelliđ tuottân Kristus vuáitu jáámmim vääldist. Taat saahâ puáhtá ruokâsmittiđ mii tuáivun já ristâlii ráhisvuotân meid taan kiidâ 2022 tábáhtusâi virdeest.

Ovdláhháá pessijái 2022

Jukka Kesitalo
Oulu pispekode pispe